



Sabtu, 27 Februari 2021

Ogen: 1 Korintus 13:1-8a



Keleng Ate



Paulus namaken keleng ate palas kerina perbahanen manusia. Kai pe si ibahan manusia adi labo palasna keleng ate maka e sia-sia. Ertina la lit ertina. Kebeluh-en-kebeluh-en si lit, umpamana ngerana, ernubuat kerina e bagi gung si erbulnang tah penganak si erdeping. Kenca ersora la lit bekasna. Malah i bas ayat seterusnya nina Paulus, bicara kusumbangken pe kerina erta-ertangu, janah bicara kukorbankan pe diringku seh mate guna ndatken kemegahan, tapi adi la aku erkeleng ate nandang i kalak si deban labo lit untungna man bangku. Ertina la lit ertina janah sia-sia. Bage me pentingna keleng ate si mpalasi kegeluh-en manusia.

Jenari lit iban Paulus tanda-tanda kalak si erkeleng ate eme megeng-geng, mehuli, la percian, la meganjang ukur, la sombong. Ia labo mekarus, la ncariken untung man bana saja, la pergelut, la ngkira kesalah-en kalak. La meriah ukurna adi kalak erbahan si jahat, tapi ikut ermeriah ukur i bas si benar. Kalak si erkeleng ate ngasup nggengken kai-kai pe, tek maka lit si mehuli i bas kerinana, tetap erpengarap-en dengen saber i bas kai-kai pe.

Ertina maka kalak si enggo nggeluh i bas keleng ate eme kalak si enggo menang i bas dirina. Menang i bas ertina lanai bo ia nggeluh guna dirina tapi nggeluh guna kalak si deban. I bas kai pe ia erbahan si mehuli dengen uga maka erguna ras ernanam ia man kalak si deban. Maka banci kita nggeluh i bas si e sada ngenca kuncina eme nggeluh kita i bas Tuhan sabab IA ulu keleng ate si la pernah erkeri-kerin. Maka la ker i keleng ate ibas kita erkiteken erbage-bage biak ras kecibal doni enda, umpamana keleng ate si ersimulih, erbalas. Arus maka si iket keleng ate si lit ibas dirinta alu keleng ate si Dibata saja ngenca uluna.